



Thoes in dees sjtraot

Oet de serie

- **De BABYBOOM-GENERATIE** -

Deil 2

Bie ós thoes

Veur zien de BABYBOOM-GENERATIE, net nao de oorlog gebaore
Mer leef luuj, wat is dae tied anders gewaore

Zie die toen gebaore zien, vinje zich truuk in dit gedich
Net zoe good as ich

Zes kieër kreeg ós mam 'n kiendje en den zag zie: "Och Leve Hieër"
Zó'n groeët gezin ken ich mich gaar neet leiste
Den zag pap: "Vrouw ich maak 'n euveroer mieër"
Want met die zes höbs doe nag lang neet de meiste

Smeets van de Zang "toverde" petatte door de kelderkoekoek bie ós op de telder
Haje veur neet genóg gegaete zag mam: "Pak dich mer 'ne appel oet de kelder"

Kaoleboer Lot van Zeegers brach de sjlam, de eierkaole en de briekette
En den kóste veur ós weer 'ne ganse wintjer werm bie ós aad fornuuske neerzette

Ós mam lieënde dökker aan de bure den dit en den det
Det leek mieër op det sjpel, geur weit waal kwartet

Den zag zie : "Nel haes doe ein paar eier den ken ich dae cake bakke veur mich?"
Den kriese mien appele en kens doe appelemoos make veur dich

Zóch mam de hertedeef den zóch zie neet nao ós
Mer nao det pötje met greune rómmele
En den zag zie : "Det sjtóm fornuus, ich bön met tante blank begós
Mer blinke zal d'r, ouch al brandj d'r neet mieër de lómmele

Nao sjoeëltied sjpeelde veur "in de Bercken" of voetbalde op sjtraot
Sjote veur as "rotjónge" waal ens 'n roet aan diggele en den waar emes kwaod

Saoves zoot ózze pap met buurmen op 't sjtuupke veur de veurdeur
En de gewaogste mop van d'r Tunnes en d'r Sjael dae huurde veur

Vermingk met ieskaad water oet de raegepöt
woorte kaokende moere water in 'n groeëte buut gesjöd
Woe veur ós met zes kinjer in móste wasse
Mer de letste haaj aaf en toe baeter kenne passe

Són-des keke veur net get anders as "sjaele Frens" nao 't voetballe
En bleve sjmaondes euver "de blauwe van Helden" en Pietje van Vogels kalle

Ein frietje van “friet An“ det haje veur as ‘t kós hiel gaer
Mer ouch hele veur van det lekkere ies van Teunissen Baer

Sjmaondes kwaam Teun de Sjilleboer en reep: “Schillen en schalen”
En den kwaam Sens de bie hum gehuurde wasmachines truuk “halen”

’T graas achter ‘t hoes kwaam in die jaore good van pas
Want dao bleikde ós mam toen de was

De haofpaad waar links en rechts met geglazuurde sintjelsjtein “versierd”
Die bleve ligke toetdet ich mien köpke aoep veel, want det verleep verkieërd

Bezeuk kwaam in dae tied door de achterdeur achteróm
Is die in deze tied aoep, is det ouch waal ens verkieërd en get dóm

Saoves zote veur, veur de radio en huurde same ROZ
Veur haje genne televisie mer det waar gezellig en toch hiel net

Veur loesterde nao Paulus de Boskabouter, ‘ne interland of Snip en Snap
En met “Mens erger je niet” of damme verleep ‘ne wintjeraoend hiel rap

Veur zónge met Sinterklaos “Kom maar binne met je knecht”
En ‘ne Pieterman ramde den oppe roete en veur ware den gans van de legk

Sinterklaos bleef ‘t hiel lang bie ós good doon
En det veur mer ein wortel in ‘ne kepodde aje sjoon

In dae tied waar d’r mer eine telefoon in de ganse sjtraot
En dae waar d’r allein mer veur “belangrieke (noeëd)praot”

Gings se belle bie die luuj, kreegs se te hure: “Neet te lang”
Det kós gaar neet, want d’r sjtóng ‘n lange rie in de gank

Toen waar d’r mer ein gezin det ‘ne televisie haaj in de ganse sjtraot
En dao moogde veur neet mieër kieke, nao herrie met häör kinjer,
want den waar dae pap of die man efkes kwaod

Veur wólle Pippo, Mammelou, Lassie of tante Hannie zeen
En “Voor de vuist weg” met Willem Duys, daoveur ging idderein “door de kneen”

Vreuger waar d’r vuuël wat anders verleep
Veur zagte belaeft: “Watbleeft?” as ós emes reep

Veur kaakde neet “Wat mós se?” of “Wat jeuk dich?”
Veur ware toen bang veur de plies as dae reep: “Hé jij daar zonder achterlicht!”

Veur laefde en belaeftde van alles op ós meneer
Det herinnere veur ós as ‘n treinke det boemelt oppe rails op en neer

Veur haje nieks mer waal elkaar en vuuël lol en plezeer, in dae tied
Dao-aan dink ich gaer truuk en die herinneringe bön ich neet kwiet

JOHN GUBBELS

(Met get dichterlike vrieheid)